



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim


tiryimiyim@aolima

tir yimiyim

TAPAK 3

Amit Shah-i J&K industrial development portal amenoktsüogo

NDFB tanishir Ranjan Daimary chioktsü atema takhangba agütsüshir



VOL. XVIII NO. 319 (ADOK 319) DIMAPUR

RASEMNÜ (WEDNESDAY)

RONGJUI (SEPTEMBER) 01, 2021 ₹ 5.00

## CM Rio-i Langto Tea Industry lapoktsüogo



August 31, 2021 nü Chief Minister, Neiphiu Rio-i Mon nung Langto Tea Industry Sangsa lapoktsüba noksa nung angur.

**Dimapur, August 31, 2021 (TYO):** August 31, 2021 nü Chief Minister, Neiphiu Rio-i Mon nung Langto Tea Industry Sangsa lapoktsüogo.

Langto Industry kiburtemi süngolu ayimertem ajungkettsü atema industry tulu lapokba atema tenüngsang agütsür, ta CM Rio-i ashi.

"Süngo ya China nung adok aser Asia o Africa linük aika nung tsünür. Tizit nung alirtemia süngo teimba ayimtsü aser süngojok tajung adokdaksütsü

merangtsüla" ta paisa ayongzük. Tizit nung tsüngsang-mopung tajung lir aser ali den tanga rongsen peria dang lir. Iba industry ajanga Tizit nung alirtem dang masü saka Mon district ajunga ajangzüksü, ta CM Rio-isa metetdaksü.

Tanü CM Rio den Agriculture & Co-operation Minister G. Kaito Aye, Transport Civil Aviation, Railway and Land Resources Minister Paiwang Konyak aser MLA, C.L. John o MLA Yollow Konyak nunger aru.

## COVID-19 Nagaland: 80 dak putet, 27 taneptsü angu & 3 asü

**Kohima, August 31, 2021 (TYO):** Mongulbarnü Nagaland nung nisung 80 dak COVID-19 putet aser parnok züngsema nisung ajak agi 30,083 kümogo. Külén, COVID-19 puteta alir nisung 3 asüba züngsema tasür ajak agi 620 kümogo.

"Mongulbarnü nisung 80 dak COVID-19 aliba putet. Parnokji Dimapur nung 56, Kohima nung 11, Mon nung 6, Mokokchung nung 4 aser Phek nung 3 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüngda COVID-19 puteta alir nisung 27 taneptsü angu. Parnokji Dimapur nung 9, Kohima nung 7, Mokokchung nung 6, Peren o Phek nung anana (2) aser Mon nung 1 lir" ta paisa ashi.

"Tang nisung 815 anepaludar aser nisung 27,762 taneptsü nguogo. Nagaland nung COVID-19 putetba sülen taneptsü angubaji 92.28% lir" ta paisa shisem.

Mongulbarnü Dimapur nung COVID-19 puteta alir nisung 3

asü aser parnok züngsema tasür ajak agi 620 kümogo, ta Dr Kikon-isa metetdaksü.

"Tang tashi nung COVID-19 alitsü akok ta temolung melemi bilemba sample 320,909 tendangogo. RT-PCR ajanga 106,219, TrueNat ajanga 76,054 aser Rapid Antigen Test ajanga 138,636 tendang" ta Dr Kikon-isa ashi.

"Hombar tashi nung nisung 655,716 nem COVID-19 vaccine indang dose 853,764 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,848, healthcare workers 15,991, arishi küm 45 ser temapur 192,637 aser arishi küm 18 nungi 44 tsüngda alir 386,240 lir" ta paisa ashi.

"Vaccine agirtem rongnung nisung 198,048-i dose anaprong agiogo. Parnokji frontline workers 44,047, healthcare workers 12,910, arishi küm 45 ser temapur 114,107 aser arishi küm 18 nungi 44 tsüngda alir 26,984 lir" ta Dr Thurr-isa metetdaksü.

## Dimapur nung NSCN(R) indang mess aser barrack shibangtsü

**Dimapur, August 31, 2021 (TYO):** Dimapur kübok Chekiye nung sepaitem den police-i NSCN(R) indang mess aser barrack shibangtsüogo.

Osang tejangka ka angazükba nung ajemdaker sepaitemi Chekiye nung NSCN(R) indang mess aser

living barrack mita aodang telungpur 7 apu. Parnoki iba tesem nungi ozüng alema mapa inyaka aru.

NSCN(R) züngsemtemi Ceasefire Ground Rules alema inyakba atema tashitsü kar shir Diphupar police station nung parnok chiokogo.

## Nagaland nung shisaluyimba jenjang tajungba akümtsü: Vision Document

**Kohima, August 31, 2021 (TYO):** Nagaland nung literacy rate 79.55% lir aser iba nung ajemdaker Nagaland sorkari 2030 küm tashi nung tanurtem primary level nung 100 percent enrolment atongtsü nükjidong lir.

Iba mapa atema anganwadi tashi itdaksütsü, childhood education agütsütsü aser infrastructure tajungba kümdaksütsü, ta Nagaland SDG Vision 2030 nung shia lir.

2030 küm tashi nung ajak nem quality education den vocational training agütsütsü atema sorkari alizüng ayur.

Anganwadi aser early childhood education tashi itdaksütsü atema anganwadi o school tem tesentaktep tajung ayutsü aser iba ajanga kaketshirtem anganwadi nungi primary school-i tiptema aotsü, ta sorkari ashir.

State sorkari Right to Education Act 2009 kübok madenba Nursery, A aser B class tem nem temolung agütsütsü sentong lir.

Department of School Education (DoSE)-i taruba küm

10 tsüngda early childhood education sayatsü aser iba nung Diploma in Early Education (D.El.Ed) anguba tesayurtem amshitsü.

Tesayurtem aser kaketshirtem ajangzükdaksütsü atema sorkari infrastructure ajungkettsü. Sorkari State-level HRD Centre aser school, higher o technical education level nung Digitisation mapa inyaksü.

Nagaland sorkari yimtsüng aser jila ajak nung school tem lapoka shisaliok angazükdaksütsü meranger, ta Vision Document nung shia lir.

Financial Year 2018-2019 nung state sorkari school education atema Rs 1232.94 crore endok ajisüaka tajangzük tuluba angutsü atema senotsü talila endoktsüla ta Vision Document nung shia lir.

2030 küm tashi nung sorkari school züngtor anenba 0% tashi ajemdaksütsü aser tangar memenepba tanurtem 100 percent enrolment asütsü, ta Document nung shia lir.

Nagaland sorkarisa Directorate of Technical

Education ajanga higher & technical education rejutem akangshitsü sentong lir.

Kaketshirtemi school züngtor anenba aser higher education azüngtsü ajungmesotsü atema sorkari local NGOs den yaritepa youth clubs aser student unions tentettsü tebilemba lir.

Technical education rejutem den yaritepa sorkari job fairs, placements aser campus interviews ayonga agitsü aser item sentong ajanga lanurtem nem mapa inyaksü maangka agütsütsü aser lanur mapa manguba khuret ajemdaksütsü, ta Vision Document nung shia lir.

Nagaland sorkarisa technical education institutions/polytechnics nung course talila bendenloktsü. Iba ajanga kaketshirtem tanga state temi moi Nagaland nung dang azüngtsü.

2018 aser 2030 tsüngda Nagaland state sorkari tang aliba polytechnic tem nung degree-level engineering college amenoktsü sentong lir, ta Nagaland SDG Vision 2030 nung shia lir.

## RPP-i GHC nung 'backdoor appointments' anema PIL benok

**Dimapur, August 31, 2021 (Agencies):** Nagaland sorkari department balala nung nisung shimoktsü lemtetba anema Mongulbarnü Rising People's Party (RPP)-i Gauhati High Court nung Public Interest Litigation (PIL) ka benokogo.

Department of Personnel and Administrative Reforms-i state sorkar department 76 nung mapa tazüngtem asoshi departmental examinations agitsü atema tashi agütsüogo aser iba telemetba anema RPP-i ken o benok.

Sorkari backdoor nungi mapa shimoktsü alizüng nung iba

telemetba agi, ta RPP-isa metetdaksü.

RPP-i benokba PIL nungsa Nagaland Staff Selection Board (NSSB) tenzüksü takhangba agütsüogo.

Gauhati High Court indang Kohima bench nung RPP-i advocate aser counselor Neiteo Koza ajanga PIL benok.

August 13, 2021 nü RPP-i Nagaland Chief Secretary dang Department of Personnel and Administrative Reforms-i sangdong agütsüba meyipa agitsü aser NSSB tenzüksü takhangba agütsü saka sorkari

ibaji magizük, ta tanü parnoki sangdong ka nung ashi.

"Nagaland Public Service Commission aser NSSB recruitment exams ajanga dang state sorkar mapa tazüngtem indang advertisement agütsütettsü aser shimtsü akok. Sorkar mapa nung backdoor appointments anema RPP-i zünger mapa manguba lanurtem den külemi raratsü. Anungji tangatetba shitak aliba senso aser civil society telok ajaki asen state tarutsü atema noktaksü ayongzük" ta Rising People's party (RPP)-i metetdaksü.

## Manipur sorkari poppy lu ayimer nem urea agütsür: Jairam Ramesh

**Guwahati, August 31, 2021 (Agencies):** Manipur nung BJP sorkari aluyimer nem agütsüba urea belenzük opium lu nung amshitsü agütsür, ta taoba Union Minister Jairam Ramesh-i tai tongloktsü.

Manipur nem urea anasü agi teimba agütsür saka state nung aluyimertemi peria manguba ashir, ta Congress lennir Jairam Ramesh-i metetdaksü.

"Manipur-i nüngdakba urea anasü agi teimba agütsür saka aluyimertemi peria manguba ola adoker. Kechiba ta süra, urea ji Manipur kübok hill areas nem agütsür. Tesüiba küm 4 tashi

item tesem nung opium atema poppy alu ayimer. State sorkari iba nung yariteper" ta paisa ashi.

Manipur nung aluyimer ka urea bosta ka angutsü atema tarensena noktakang asü, ta Congress Manipur Secretary, Shah Nawazkhan-ia ashi.

"Manipur nung aluyimertemi BJP sorkari Urea Fertilizers magütsüba atema lungkak aiter. Tia maka, aluyimer ka urea bosta ka agizüksü atema Aadhaar card aser land record agütsütsü atema tarensena noktakang asü" ta Shah Nawazkhan-ia ashi.

Manipur nung amenoka aliba aluyimer telok- Loumi Shimee

Apunba Lup-i aluyimertemi urea peria manguba atema bushisüngdang asütsü takhangba agütsüogo.

Aluyimer karibo urea meshia lumia lungkak aitogo.

Ajisüaka, Manipur agriculture minister Oinam Lukhoi-i urea peria dang lir ta ashir.

"Sorkari Agri Department ajanga aluyimer ajak nem agütsütsü atema meranger" ta Lukhoi-i ashi.

CM N Biren Singh lenistüba kübok sorkari aluyimertem ajungkettsü meranger, ta paisa shisem.

## Minister Pangnyu-i CHC Chizami semzüksü



H&FW, Minister, S. Pangnyu Phom aser ketdangsertem Chizami nung Community Health Centre semzükba sentong nung külemi tangokba noksa nung angur.

**Dimapur, Luroi/August 31 (TYO):** Chizami, Phek nung Community Health Centre semzükba sentong ka August 31, 2021 nü agia liasü, kong Minister, Health & Family Welfare, S. Pangnyu Phom ya tesemdanger tongti ama arua shilem agi.

Iba sentong nung Minister

Pangnyu meina Principal Secretary H&FW, Amardeep S Bhatia, IAS; Director H&FW, Dr Vikato Kinimi; MP Rajya Sabha, K.G Kenye; MLA Chizami A/C, Kezhienyi Khalo aser Deputy Commissioner, Phek, Razouvolie Dozo nungertem arua dena liasü.

Iba sentong nung CMO Phek, Dr Khriezotuo Paphino menden liasü aser Chairman, Chizami Village Council, Kewepelo Tshuhah-i tarur pela agizükba o jembi. Maneni sentong nung Convenor, COLA, Colo Mero-i melepzüng o jembia liasü.

## Tuli nung Organic Food Processing Plant ya tekeraba nung tenzüksüla: BJP 21 Tuli Mandal

**Dimapur, Luroi/August 31 (TYO):** Ministry of Tribal Affairs, Government of India ajanga Tuli, Mokochung nung Organic Food Processing Plant amenöksü atema financial year 2019-2020 mapang sen crore ana sanction süogo ta Raising Peoples' Party, Nagaland ajanga osang balala nung sangdongba ngua süngmanger, ta Bharatiya Janata Party 21 Tuli Mandal sangdong ka ajanga ashi.

Government of India ajanga iba ama mapa tajung inyakba ya pela agizüker, saka kanga tia maka BJP 21 Tuli Mandal office ajanga tang tashi iba project shiba nem agütsü mesüra kong agütsü, itemji mejangjateti lir. Sakasa iba project ya teyari anguri tekeratiba nung tenzüksü amanger, ta BJP 21 Tuli Mandal tir, Nuklutemjen-i sangdong ajanga ashi.

Anungji BJP 21 Tuli Mandal

ajanga contractor dang tekeratiba nung ki-o-jen yanglua terenlok maparen inyak tenzükla latetja aliba mapang nung iba project renemtsü ayongzükler, ta ashi.

Area nung nüburtem ajangzüksü asoshi BJP 21 Tuli Mandal ajanga repranga matai mera balala amshia iba maparen mapang shidak nung tembangdaksütsü, ta sangdong ajangasa ashi.

## September ita POSHAN Abhiyaan sentong agitsü

**Dimapur, Luroi/August 31 (TYO):** Nisung ka temang ainba nung nokdangba ajema kumdaksüba, temang asoshi chiyongsü shidak manguba, tanur asodang tuozük ajema asoba, tanur aser tetsür dak anaemia aliba amala ajemdaksütsü asoshi tanur aser tetsütem temang atema chiyongsü shidak achi-ajemba renloksü nükjidong nung Ato Kilonseri POSHAN Abhiyaan ya tenzükja liasü.

POSHAN Abhiyaan takok ngua aser kanga junga amshitsü atema Jan Andolan aser community mobilization ya kanga tongtipang lir.

Iba nükjidong den lirumedema Rashtriya Poshan Maah ya 2018 küm nungi tenzükla September ita stakeholders tem den lungjemer benjonga arur. Iba benjong nung tongti shilem agiba department temji DoSW, School Education, Local administration, RD-NSRLM, H& FW - AYUSH & PHED alitsü.

Rashtriya Poshan Maah pezübuba ya September 2021 nung amungtsü renema lir. Taküm Rashtriya Poshan

Maah 2021 atema tamendak dak omen pezü alitsü jangjatetogo, koba hopta shia kaka alitsü.

Yimtsüng sasep nung Panchayati Raj tentet ya nodal point alitsü. Hopta shia Rashtriya Poshan Maah 2021 indang omen dak ajemdaker maparen balala inyakba mapang Panchayati Raj-i community mobilization, nüburtem rongnung awareness agütsütsü.

Ita tepiyong iba benjongmung atema Action Plan yamai alitsü:

Mezüng Hopta: Plantation activity as "POSHAN VATIKA" - September 1 nü POSHAN MAAH tenzüksü, koba district & block aser yimtsüng sasep nung mashisa tetsütem atema temang nung teyari agütsüba chiyongsütem indang yimyim zülutepba, süngtonglitong atemba aser atsüki anepaluyim temaba jenjangi ajungkettsü.

Tanabuba Hopta: Yoga and AYUSH for nutrition - Yoga sayuba, Anemia camps aser sorochiokba tetoktepbatem yimtsüng, block aser district sasep nung alitsü.

Tasembuba Hopta: Nutrition Kits distribution to Anganwadi beneficiaries in High Burden Districts - iba hopta nung temsüa aliba tajangzük angur nem mapang shidak nung nutrition kits lema agütsüba, local food show, Poshan Seminar aser Poshan rally tem block aser district level nung alitsü.

Pezübuba Hopta: Identification of SAM children - POSHAN Panchayat ajanga ki sema September 1 nungi September 15 tashi AWW, ASHA, ANM kübok tanur arishi küm 5 kübok alirtem tar aser temang tuozük asadanga jajatsü. Iba sülen health mapa inyaker yarisema SAM tanurtem jangjatsü aser community based awareness aser sensitization mapa tem inyaksü. Yimtsüng, block aser district sasep nung IYCF - (Infant and Young Child Feeding) indang awareness campaign agitsü.

Pongububa Hopta: Chiyongsüagütsüba, teka müreka ayuba (WASH), VHSND amala nung Essay aser Quize tetoktepbatepba agitsü aser September 30 nü tembangtsü.

## AR/SF temi CFGR nung aibeleni inyaksangshir: NSCN (R)

**Dimapur, Luroi/August 31 (TYO):** Assam Rifles/Security Forces temi August 30, 2021 ankongbang 2:00 ako meta Kilonser Khekato'er ki mita bushiba atema NSCN/GPRN (Reformation) ajanga aitsür, koba agu tila tanur densema kinunger aser temeket nung alirtem rongrongdakja, tsübutepdaksü aser temolung tip metemdaksür timtemdaksü, ta NSCN/GPRN (Reformation) indang MIP (Ministry of Information & Publicity) sangdong ka ajanga ashi.

AR/SF ajanga iba ama mapa inyakba ya tekeratiba nung anentsüla aser NSCN ajemajema aliba ya tashi mait ama meblemtsüla, kechiaser NSCN-i CFGR (Ceasefire Ground Rules) indang yimya aser tasüngtet inyakyim tendanga atar aser nüburtemi yimjung aginüba akumtsübur, koba tasü mait ama mashileni meyipzükla magitsüla, ta ashi.

AR ajanga May 31, 2021 nunga Kilonser Khekato'er ki mita bushia liasü, aser iba atema NSCN (R) ajanga Kohima aser Delhi nung CF senden nung ken o benoka liasü.

Senden nung CFSB team ajanga CFGR indang nenshia ashi, kong NSCN züngsemtem aliba ki mita mebishitsü, mita atar timtem magütsütsü mesüra aibelen masütsü, ta jangja jangja shia lir, aser yamaji inyaker dang kasaji alitsü ajungshia liasü.

Timtem aser mangatetep kar danga lira itemji timi angateteptsü asoshi CFSB team/office dangi abentsüla aser yangji angatetepta CFGR nung aliba ama inyaksüla aser telok anaprong jawan tem aziüoktsüla, ta NSCN (R) ajanga ashi.

Ajisüaka NSCN-i CFGR nung aliba ama inyaksü merangba mapang SF/AR temi balaka inyaka tanen makai ki-o-jen mita bushir, koba anatsü nok amai lir, ta ashi.

NSCN (R) ajanga tim ketdangsür dang tekeratiba nung teka amuoka iba ama tim masüba mapa nungi nokdangtsüla aser rara mesüba maparen meinyakdaksütsüla, aji mesüra tashi mangaba jawan kar mechi kanga meranga aazükla aliba yimjung raksatsü, ta NSCN (R) sangdong ajangasa ashi.

## DIPR-i Assistant Director den tepila sentong agi



**Dimapur, Luroi/August 31 (TYO):** Directorate of Information & Public Relations ajanga mapa nungi anisüngzük angula, Assistant Director, Kepelhoutuonuo Beio den tepila sentong ka August 31, 2021 nü Directorate of Information & Public Relations, Kohima nung agia liasü.

Iba sentong nung Joint Director, Asangla Imsong-i o tatsüka jembiba mapang, mapa nungi anisüngzükla ketdangsür ya temolung agüja nendaka inyakba nübu ka aser tamang katetba lenir ka lir, shibai Department asoshi tajungtiba nung inyakogo, ta ashi.

La ya meranga inyakba nübu ka liasü, shibai la nem nungloksüba mapa takok angutsü asoshi bendanga

agütsür inyak, ta ashi. Director, IPR, Er. Tokishe Sema-ia Beio ya mapa tajet aser tashi angaba ketdangsür ka lir, ta ashi aser külemi inyakba mapang ajangshibatem lemsatepa liasü.

Kepelhoutuonuo Beio-i sentong nung jembiba mapang, Department-i la nem maongka balala agütsüba asoshi pelaba lemsatep aser iba department la lar ki tanabuba lir, ta ashi.

1986 küm August ita department nung mapa inyak tenzükba nungi lai ajangshibatem lemsatepa liasü. Officer aser staff temi bendanga agütsür mapa meranga inyakba atema Beio-i pelaba lemsatepa liasü.

Iba sentong nung Assistant Director, Ketarumakbo Zeliang menden liasü.

## Gorkha Public Panchayat Kohima lokti senden ayonger

**Dimapur, Luroi/August 31 (TYO):** Ken o balala jembishinütsü atema Gorkha Public Panchayat Kohima indang lokti senden ka GPPK Multi-Utility Hall, Chandmari, Kohima nung September 5, 2021 anüngdang 12:30 ako nungi amentsü, ta GPPK tongti zülur Suresh KR. Lama-i sangdong ka nung ashi.

Iba senden nung G.B, executives, Area shia nungi

teshimtet nübutem, Gorkha NGOs & clubs ajunga indang advisor tem, NGOs/clubs nung taoba executives, senior leaders aser züngsem ajunga arua adentsü metetdaksüogo.

Station nung maliba züngsemtema iba senden nung arua adentsü mepishir aser senden tepiyong nung COVID-19 protocol tem amshitsü, ta sangdong ajanga ashi.

**GOVERNMENT OF NAGALAND  
DIRECTORATE OF TECHNICAL EDUCATION  
NAGALAND, KOHIMA**

**NOTIFICATION**

NO. DTE/ESTT-2/02/2021-22 : The Common Selection Board has provisionally selected the following candidates for study of Under-Graduate Degree Courses in Para Medical/ Agri. & Allied Courses for the academic session 2021-22 based on the merit list of Nagaland State Entrance Examination (NSEE-2021) as listed below:

<b>BVSC &amp; AH</b>				
Sl.No.	Name	Fathers Name	Tribe	NSEE Merit
1	MR. IMLIMEREN LONGKUMER	K TIAKABA LONGKUMER	AO	1
2	MR. M SENDEMO TSANGLAO	T MHONTHUNG TSANGLAO	LOTHA	2
3	MS. SULIKA A YEPHOTO	AKUTO	SUMI	4
4	MS. KHRIETHONO KIKHI	VITHUZOL KIKHI	ANGAMI	5
5	MS. IMTIJUNGLA LONGKUMER	IMKONG LONGKUMER	AO	8
6	MR. KEMZEUSAP SEPHE	PAUSUIGONG	ZELIANG	10
7	MS. IMOTENLA WALLING	BURMAYANG WALLING	AO	11
8	MR. PHANGAN B PHOMC	BANGNYEI PHOM	PHOM (BT-1)	12

<b>B. Sc. Agricultural</b>				
Sl. No.	Name	Fathers Name	Tribe	NSEE Merit
1	MR. AKTHO NYUWI	SIETSUTHO NYUWI	POCHURY	3
2	MS. THERALI PATTON	BENRITHUNG PATTON	LOTHA	6
3	MR. AKHO ZHASA	DOVI ZHASA	ANGAMI	7
4	MS. LIZA ZHIMO	BOHOTO ZHIMO	SUMI	13
5	MR. VISAZO MEPFHÜ-O	KHRIEVOKUOLIE MEPFHÜ-O	ANGAMI	18
6	MR. AZUTO YEPHOMI	GHOKITO SUMI	(KIPHIRE)	23
7	MS. ABIKALI SUMI	S YEHOVI SUMI	SUMI	27
8	MS. VIKETOUNUO TACHU	ZEDILHOU TACHU	ANGAMI	30
9	MS. ANGSHAN NGIYESHU	P HAOSHI NGIYESHU	KONYAK	31
10	MR. KAKHE DOULO	KIETUO DOULO	CHAKHESANG	33
11	MS. VINEIVONUO KHAWAKHRIE	MHIESILHOUBEI KHAWAKHRIE	ANGAMI	34
12	MR. NGON L	S LAM	KHIAMNIUNGAN	37
13	MS. IPETOLI H YEPHOTO	HOTOPI YEPHOTO	SUMI	39
14	MS. MHARHONI L ODYUO	LIRENTHUNG ODYUO	LOTHA	43
15	MS. MARINA ODYUO	L DAVID ODYUO	LOTHA	48
16	MR. KAVI H ZHIMO	HOISHE	SUMI	49
17	MS. KHYOCHANO EZUNG	SOLUMO EZUNG	LOTHA	50
18	MS. LISHEN PHOM	K CHINGDAN	PHOM	51
19	MS. OWNGOI LAKPAN	M SHAMEI LAKPAN	PHOM	52
20	MR. PANGTOK AP	PONGTHRA	KONYAK	53
21	MS. ZUCHANBENI PATTON	YIPTHUNG PATTON	LOTHA	60
22	MS. THÜKÜNIELÜ CÜKHAMU	VEKUSÜ CÜKHAMU	CHAKHESANG	61
23	MR. KHROKU KRONU	LT. NEISA KRONO	CHAKHESANG	63
24	MS. IBACHULE	LT. DIPEURANG SIANG	ZELIANG	64
25	MR. NOKRENTI AMER	JENTIRONG	AO	65
26	MS. VIKINALI CHISHI	BOKATO SEMA	SUMI	66
27	MS. ZUCHANI M HUMTSOE	J MHONBEMO HUMTSOE	LOTHA	67
28	MS. KIKUSENO YANO	ZHA-O YANO	ANGAMI	68
29	MS. MACETYILE	KEYINDEULUNG	ZELIANG	69
30	MS. NEIKIEÜ SACHÜ	KHRIESILIE SACHÜ	ANGAMI	70
31	MR. ANGUPU S SWU	N SAVITO SEMA	SUMI	71
32	MS. LOCHUMBENI PATTON	NCHUMBEMO PATTON	LOTHA	74
33	MS. HAIMPAUNEILE NEWME	N SHAMMA	ZELIANG	75
34	MS. MONYU REBECCA T	THONGO KONYAK	KONYAK	76
35	MS. AMEKALI RUTH SWU	HOVIKHE SWU	SUMI	78
36	MS. NGUVI NYUTHE	ZHITHO NYUTHE	POCHURY	79
37	MS. KHINIYA TEP	PENCHWILO TEP	RENGMA	80
38	MS. THEPFUSATUONUO SOLO	THEPFUNYUHU SOLO	ANGAMI	82
39	MR. TIASUNEP LONGKUMER	MOAMEREN	AO	84
40	MR. TOMEKA CHOPHI	GHOSHITO CHOPHI	SUMI	85
41	MS. LEENA K AWOMI	KAHOSHE AWOMI	SUMI	87
42	MS. NUCHAI L	LANGSHIE KHIAMNIUNGAN	(BT-1)	91
43	MR. IRIETIENG RAMLYA	KIEREU RAMLYA	ZELIANG (BT-2)	94
44	MS. VENELU CHUZO	VESAPRA CHUZO	CHAKHESANG (BT-3)	95
45	MS. AKUTHSURHO NGOURI	KHUNYUOVO NGOURI	POCHURY (BT-4)	103
46	MS. KHUMRILA S SANGTAM	R K SETSIBA	SANGTAM (BT-5)	104
47	MR. JEIANG NM KONYAK	NGAMWANG	KONYAK (BT-6)	106
48	MR. LUNSOMONG YIMCHUNGER	THRONGSO YIMCHUNGER	YIMCHUNGER(BT-7)	144

<b>B. Pharm</b>				
Sl. No.	Name	Fathers Name	Tribe	NSEE Merit
1	MR. VIKESZO SEMOU	KEZHALETUO SEMOU	ANGAMI	16
2	MS. MEGOVINO ANGAMI	NAWANG ANGAMI	ANGAMI	19
3	MS. ESTHER THONG	WASHINO THONG	RENGMA	36
4	MS. SUNGJEMKABA JAMIR	LULEN JAMIR AO	AO	41
5	MS. ABOKALI	KHEKATO	SUMI	42
6	MS. NANCY MAGH	HISINLO MAGH	RENGMA	47
7	MS. ASANO NAPRANTSU	VILHUBI NAPRANTSU	ANGAMI	55
8	MS. C NEANGMAI	S P CHIMANG	KONYAK (BT-1)	86

<b>B. Sc Forestry</b>				
Sl. No.	Name	Fathers Name	Tribe	NSEE Merit
1	MR. KEKHRIESILIE LHOSHUE	MHASIZOKHO LHOSHUE	ANGAMI	14
2	MS. VIKESANO NISA	PEKRUVOTO NISA	ANGAMI	17
3	MS. KÜGHÜFI PFINYU	RETHO PFITHU	POCHURY	20

<b>B. Sc. Horticulture</b>				
Sl. No.	Name	Fathers Name	Tribe	NSEE Merit
1	MS. TOSHIELLA LONGCHAR	IMO LONGCHAR	AO	26
2	MR. GEORGE MERO	MICHAEL MERO	CHAKHESANG	54
3	MS. HEIBAULE	IKIESAPPE	ZELIANG	58
4	MS. MERENZUNGLA MAR LONGKUMAR	MARTOSHI LONGKUMER	AO	72
5	MR. VISASIEO ZHÜNYÜ	KECHAVIKHO ZHÜNYÜ	ANGAMI	88
6	MS. ARHONI E OVUNG	ELITHUNG OVUNG	LOTHA	89
7	MS. KUMALI OVUNG	THUNGPEMO OVUNG	LOTHA	93
8	MR. VIPHRESILIE	THINOKIELIE	ANGAMI	96
9	MS. KITISENLA O JAMIR	OSSAR JAMIR	AO	97
10	MS. SENJANO N HUMTSOE	NRIBEMO HUMTSOE	LOTHA	98
11	MS. KENEINUO KHEZHIELT.	DIETHOVOTUO KHEZHIE	ANGAMI	100
12	MR. IZIPUNGBE RAMLIA	IRAKLUNG RAMLIA	ZELIANG (BT-1)	101
13	MR. MANJO K KONYAK	C KHONTHREI KONYAK	KONYAK (BT-2)	115

<b>B. Sc. Fishery</b>				
Sl.No.	Name	Fathers Name	Tribe	NSEE Merit
1	MS. VINGUNUO TALIE	KECHALHOUBEI TALIE	ANGAMI	32
2	MS. SUNEPIENLA IMCHEN	TINUYANGBA IMCHEN	AO	38
3	MS. ATSONUO KENSE	KENEILHOULE ROCKY KENSE	ANGAMI	59
4	MR. KELHOUVIZO KEYHO	VITSOLIE KEYHO	ANGAMI	73
5	MS. EKONBENI KIKON	THUNGCHIO KIKON	LOTHA	90
6	MS. SESOZO-U MERO	PFUCHUDIELO MERO	CHAKHESANG (BT-1)	99

<b>RIT</b>				
Sl. No.	Name	Fathers Name	Tribe	NSEE Merit
1	MS. WICHAMTHULE	NAMNA	ZELIANG	40
2	MS. PUSAVINÜ VITSU	KROVI VITSU	ANGAMI	44
3	MS. MOANARO LONGKUMER	IMSUNUNGSANG LONGKUMER	AO	45

<b>B. Sc Nursing</b>				
Sl. No.	Name	Fathers Name	Tribe	NSEE Merit
1	MS. N ZAMYUN KONYAK	NYEMPHOA KONYAK	KONYAK	15
2	MS. NZANRHONI KIKON	G HABEMO KIKON	LOTHA	24
3	MS. ARUONUO ZIEPHRU	METHAKIELIE ZIEPHRU	ANGAMI	25
4	MR. TSOINIÜ B SHIU	T BUMING KHIAM	KHIAMNIUNGAN	29
5	MS. HIKILI Q AYE	QHEHOTO	SUMI	35
6	MR. LHICHE LASUSHE	TSHULINGULO LASUSHE	CHAKHESANG (BT-1)	56

<b>B. Sc. Sericulture</b>				
Sl. No.	Name	Fathers Name	Tribe	NSEE Merit
1	MS. MERCY GHAPONZA	KENILO GHAPONZA	RENGMA	83
2	MR. NOKLENGANGIEN LONGKUMER	IMTIKUMZUK	AO	92

<b>OOT</b>				
Sl. No.	Name	Fathers Name	Tribe	NSEE Merit
1	MS. MEDOKHONO SENOTSU	ROKOSIELIE SENOTSU	ANGAMI	9
2	MS. VISENO NISA	KEKOYATO NISA	ANGAMI	22
3	MS. NEIKHRIEVONUO PIENYU	KENEILHOUBEI-O PIENYU	ANGAMI	28

<b>MLT</b>				
Sl. No.	Name	Fathers Name	Tribe	NSEE Merit
1	MS. ROKOVONO YANO	SAKHOLIE	ANGAMI	46
2	MS. BANGDWAYILE	KIEBUI	ZELIANG	57
3	MS. PURSENLA MOLLER	SENTINUNGSANG MOLLER	AO	62

**Note:**The Provisionally Selected Candidates are informed to submit their Acceptance or Refusal letter to the office of the undersigned on or before 6th September 2021 till 5:00 PM. Failing to submit within the specified time shall forfeit his or her nomination.

Sd/-  
(Nungsangmenialmchen)  
Ex-Officio Director  
Issued by DIPR

## NDFB tanishir Ranjan Daimary chiochtsü atema takhangba agütsüshir

**Udalguri, August 31, 2021**

(Agencies): Temai adokba National Democratic Front of Bodoland (NDFB) züngsemtemi September 8, 2021 nü Ranjan Daimary chiochang ta takhangba agüja lokti sentong ka ayonga agütsü.

Udalguri district kübok Nalbari playground nung parnoki sentongji ayongzüchtsü aser iba mapang founder president & BTR accord/Peace accord signatory Ranjan Daimary den ano tepuokdak yua aliba NDFB züngsemtem chiochang ta takhangba agütsütsü.

Iba sentong ya Ex NDFB United Forum, Udalguri lenisüba kübok agütsü.

Maneni, iba kasa sentong ya Chirang, Kokrajhar, Baksa, Sonitpur, aser Gopur district tem nunga agiyonga

aotsü.

Lokti tentet aser political party aikati Ranjan Daimary aser tanüngba telungpurtem chiochtsü atema takhangba agüja arur.

January 27, 2020 nü Centre, Assam sorkar aser BTC administration temi NDFB aser tanga Bodo teloktem den tenangzüktepba agiba sülen iba takhangba agüja arur.

Ex NDFB United forum, Udalguri-i nübortem dang iba sentong nung adentsü mepishia metetdaksüogo.

Bodoland Territorial Region (BTR) peace agreement ajanga telungpurtem aser tanishirtem anema ken o benoka aliba meyipa repringshitsü nangzüka lir saka Assam sorkar aser Promod Boro-i aniba BTC/BTR sorkari iba mapa meinyaker.

## Assam-Meghalaya arrtsülen nisung ka khaset

**Guwahati, August 31, 2021**

(Agencies): Mongulbarnü Assam-Meghalaya arrtsü anasa Goalpara nung nisung ka khaset.

Iba nisung ya Tapas Rabha ta jangjaogo aser pa ya rubber plantation farmer ka liasü. Tanep pai rubber saplings abeni aodang mejangja nisung kari tesülen nungi injang agi khaset.

"Iba ya arrtsü anasa atalok nunga arrtsü ken o dak sendakba atema masü. Iba ya nija ken o kar mesüra tanga onük kar ajanga atalokba asütsü

akok" ta Superintendent of police, Goalpara V. V. Rakesh Reddy-i ashi.

"Kechi atema pa tepset'ar kuli mengutet. Pa ya rubber lui aodang mejangjatetba nisung kari pa dak injang khaloktsü. Par kinungertemia shinga dak temolung melemi bilemba mali ta shiogo" ta Reddy-isa metetdaksü.

Arishi küm 32 tain Rabha ya Goalpara Civil Hospital-i anir ao aser idak nung jagi Gauhati Medical College and Hospital-i anir aodang len tom nung asü, ta Reddy-isa shisem.

## Mizoram nung nisung 1,157 dak COVID-19 putet

**Aizawl, August 31, 2021**

(Agencies): Mongulbarnü Mizoram nung nisung 1,157 dak COVID-19 aliba putet aser parnok züngsema nisung ajak agi 59,119 kümogo.

Tanü putetertem rongnung tanur 219 aser Border Security Force (BSF) jawan 31 dena lir.

Sample 13,040 tendangba nungi nisung 1,157 dak COVID-19 aliba putet, ta ketdangsurtemi ashi.

Mizoram nung tang Covid-19 puteta anepalür nisung 9,107 lir aser 49,798 taneptsü nguogo.

Tang tashi nung COVID-19 puteta alir nisung 214 süogo.

"Hombar tashi nung nisung lakh 6.55 nem vaccine agütsüogo aser parnok rongnungi nisung lakh 2.36 shi kati dose anaprong agiogo" ta state immunisation officer-i metetdaksü.



## TIR YIMYIM YIMOBILEM (EDITORIAL)

DIMAPUR RASEMNÜ, RONGJUI (SEPTEMBER) 01, 2021

### Lenirtem Dak Melung Malem

- Tangsen Lemtur

**T**amalen Doha (Qatar) nung tezüngzüktep agiba dak sendakba nung Afghanistan nung bendanger sepaitem agienba ajanga Afghanistan nung tesünep alitsü, ta alimai temelung lema liasü. Anungji taoba hopta Kabul airport nung bomb pokdakja nisung 180 jungnüa tepstba ya meimlaba ka liasü. Tang tesüsa Afghanistan yimtiba, Kabul airport nungi tayimtsü ajanga nisung anitetba sülenbo iba linük nungji anünga aliba Khristantem densema minorities kechi tia-i aitsü, ta alimai shisabulua bilemstür. US aser UK densema tashi tulu aliba linüktemi Afghanistan atema kechi mera agia inyaksü, ta aikati repranga atar. UK Ato kilonser, Boris Johnson-i Taliban amokmerena, "Tang soita aliba sen billion aikaji aginüra parnoki (Taliban) linük toktsür onertembo ajak sadem-sadema yoktsüla, tetsürtem temeden akhümstübuttsüla aser tamalen ama Afghanistan ya kiralongra poktetba tesem ka mekümdaktsütsüla," ta metetdaktsüogo. Taliban teloki Afghanistan yimsüsüba tenzükba sülen International Monetary Fund aser World Bank napronglai Afghanistan nung senotsü lenmang shibanga lir aser US nung Afghan central bank senponga shibangja lir. Tang Afghanistan nungi jena mouteteremji kechi tia aitsüar memetet aser parnok kidanger linüktemi jena aotsü atema-a lenmang mali. Afghan nung refugee tem agizükdaktsütsü atema Germany foreign minister, Heiko Maas-i Pakistan densema Afghanistan kidanger linüktemi sema ao tenzükogo, ajisüaka ibaji ita aika jelia inyakba tajungba süla, ta aikati bilemer. Taliban teloki bendangertem aser tanga linüktemi nungi aruba Afghan nung meyipa aotsü atema melatsü ta nangzükogo, ajisüaka Taliban teloki ki mita aoba aser taoba sorkar aser US sepaitem den amalitepa inyaktertem apuba osang angashir. Tang Afghanistan nung chiyungtsü jenjang tupet atur aser tetsür-tanurtem densema refugees million aika linük tesem balala nung jenshia lir; kobi melii asükwa mongpu tenzüktsü aser parnok kanga timtemtsü. Anungji alimai parnok nem teyari agütsütsü atema Taliban telok dang nungi temelaba meshitsüsa akümstü aser parnok amalitep nungdaktsü ta bilemer. Russia-ibo US dang Afghan central bank nungi senotsü lenmang lapokjang ta shiogo aser China-ia US dang alima linüktemi Taliban den amalitepa inyaksüla, ta shiogo. Ibaji ajanga Russia aser China nati Taliban pusemer ama angajemer. Afghanistan nung America nungeri sen jenti indoka küm aika yaria yangertetba sorkar ka Taliban teloki ita ka tsüngda makdoktetbaji ajanga Afghan sorkar aser sepai lenirtem dak tashimait aliba bushitsüsa aküm. Küm 20 tashi bendanger linük ka dak metaloker alidang pei sasa nokdaktetsü jenjang ka meyanglutetba nungji teshisadangtsü aser tansütsü lesson lir ta angajemer. Afghanistan sepai aser Taliban sepaitem medemdangra Afghan sepai 300,000 dak tema liasü aser Taliban sepaibo 80,000 shi dang lir; tetezü Taliban dang nungibo Afghan nunger sepaitemji 220,000 agi timba liasü. Ajisüaka kechiba Afghan sepaitem Taliban sepaitem den merara?, ta aikati süngmanger. Sepai lenirtemji rongsen arishia ochimashirtem liasü aser sepaitem sorkar lenirtem dak melung malem tulu liasü; ano külen Taliban sepaitem ishika dang süaka parnoki par lenirtem dak melung lemteta taküm-a bendanga agütsütsü temelungtetba liasü, ta aikati asadangteter. Süra asen lima nunga aseni melung lemtetsüsa nübur meimba lenirtem aser ochishir lenirtem ali asü mali, ta shisadangtsü lesson ka asenoki angur.

## OLEMSABANG

### ABAM 150 Jubilee Mung Sülen Kechi Inyaksü?

- Matsüng Longkumer (Osang Zülur)

#### Okila

AD1872 ya Naga nunger, talisa Aor, yimsoshiba nung kanga tongtipang küm ka lir. Iba küm America nunger Missionary Dr. Edward W. Clark ajanga Naga limaYisu yimsü mezüng amenlok. Yisu yimsü arur kum 150 ajungba benjongmung 2022 nung amungtsü ABAM kübok aliba Arogotem yongyaseta ataba aser renemtepba mapang ka lir.

Nisunger yimya agi lokti mesüra nija jenjang ka alangteter külen iba sülen kechi inyaksü ta tasüngdangba arur. Yanglushidi Sensaksem Sabang (YSS) nung tongpurtemi iba tangatetba ya ABAM 150+ nung rangloker bener arua anogo asem tashi sensaksema aruogo. Onüki aginübaji ya liasü, Jubilee-ji Tsüngrem taochi asoshi tenüngsang agütsüba küm, taoba mapatem meyipa reprangshiba, mabensai inyakbatem reprangshiba, tai nangzükba aser tadok agütsüba, temiem sayuba küm. Ano Jubilee sülen kobala tenyaba mapa tasen inyaksü ta Tsüngrem dang mangdang tasen meshiba küm. Anungji 150 Jubilee sülen koba mangdang nung ABAM aser Ao arogotem aotsü? aser inyaksü?

Iba dak ajemdaker shisa lemsatepba Aor yinti teshisadangba lenitsü aser bilemdangtsü asoshi tatsü agi iba ocet lemsar.

#### ABAM 150+ aser Rangben AnepaluTenzükba (Holistic Ministry)

Ao Arogotem Khrista yimsü agizüker küm 150+ sülenbo ministry ya khen meyipa reprangtsü kanga nungdaker ta lemsatepogo. Tang teinyakdak mapa ya majung ta masü saka alima densa mongpu den apet reprangshia amangbapur sümedema indaktsütsü asoshi jenjang tekaba nung mapa inyaksüla. Ministry ya nisung, lokti aser alima rangpen amsemba (Holistic) nükrangdong yur inyaksüla. Tanela kümzüktsüji Arogo ka asoshi tongtipang. Iba tanela kümzüktsü asoshi nisung aser lokti rangpen arakzüdaktsüba shilemtem mesendoki anepalutsü nungdaker. Yangi shisaliokdak (schools, universities), manemer anelapudak (hospitals), nübur asoshi ayangdak (employment), alima tzümopung wazüka ayuba nung shilem agiba, aluyimertem nungitba mesüra sobaliba tajungtem, amungtsümong tajungtem wazüka ayuba nung rangloksüla. Item ya kata mesüdoki liromedema indaktsütsüla. Khristan telok balala den amalitepa tenyaba mapa inyaksü leman sadema lapoktsüla. Mokokminertem sadoka külemtettsü sa policy yanglutsüla, alirongsen nung sensaker, shi nung shiranger, shisatsü nung tangar memeneper, LGPTQI+ amala shirnok jendoka lir parnok ajungketba tenyaba mapa asentenshitsu. Teti beshiba yimya nung jangaratema alidang densa den apet melenshitsu amadokra asen lokti tejakleni maor ta metetdi.

#### ABAM 150+ aser Lim Arogo inyakyim

ABAM ya Ao Arogotem tebuti/tetsüdi ama shisangshisanga alitsü kanga tongtipang. Iba ya ataloktsü asoshi Mungdang nung inyaktertemi anir Arogo aser tamanger ajaki ABAM ya pa tata akhüm aser sentsüji wazüka yutsütsüla.

Baptist tamangba nung lim arogoji jurila yimden (autonomous) ta meteta kar. Saka Mungdang ka küpok alitsü aidangji iba jurila yimden inyakyim ya koba tashi amshitetsü mesüra atsü-anem katettsü? Joko ABAM 150+ nungbo ABAM Centralise asütsü nungdaker ta ajiteter kechiba süra mapa tuluba aser teimba adoker aser ajak arok maküm tashi tebilemba mataloktettsü. ABAM, Arogotem aser Aor tamanger liromedema yinnüra ABAM inyakyim ya mapa kar nungbo lokteper aotsüla.

Tang aliba ministry telemsa ya gender mesüra kümsük (age group) dak rangloker yangluba amai lir, tat.agi, women, youth, child, a.a. 150+ nungbo item ministry den repsema densa den apet yamai yanglushi nung koda? Tat.agi mission and spirituality, public witness & justice, women and youth empowerment, Khristan literature, loktiliba aser rongsen-ketzüng mission amala. Iba ya ajanga wadangji sadema inyaktetsü aser tetsür tebur mashishi inyaktetsü leman adoktsü.

ABAM 150+ sülenbo ajak tentetba aser ajak inyaktetba (inclusive) Mungdang ta sangdongtsüla. Tat.agi, lim arogotem nung tenzükker talisa Sannüker tetsür 50% tashibo anioksüpangzüngtsüla (tanü tashi Arogotem nung tetsür Sannüker inyakba aikabo mali). Mokokminer temsüa alirtem Mungdang nung mapa agütsütsü pangzüngtsüla aser mapa küma inyaka sayutsüla. Khrista nung asenok ajak kasa ta sayuba ama tetsür aser tebur, mokokminer ajak Khrista Arogo nung mashishi tenzüktsü mapang tongogo.

#### ABAM 150+ aser Tenyaba mapa

Arogo (ABAM) ya Tenyaba Mapa ajanga aser Tenyaba Mapa inyaksü asoshi alir. Iba Tenyaba ya nisung nungi masü saka Tsüngremi Tenyaba Mapa lir (Mathi 28:19).

Local Arogotem sasep nung jurila mission mapa balala inyaka aoba ya Mungdang kübok lokteper ka küma inyak nung ajungtsü südi ta Zulu Jamir-ishia liasü. Hau Baptist tamangba nung autonomy ya tongtipang nükmän ka lir saka tajung ka asoshibo atsü-anem lia mapang aser densa den apet melenshiyonga aotsü menungnangtsüla. Arogo ajaki pei jurila inyakba ya junger aser takok ngudar saka item alirongsen, nübu aser wadang lokteper nungbo ano kanga sadema mapa tuluba telungjunga jeta bener aotsü.

#### a. Ateptsüng/lim Tenyaba Mapa

Litsü atena/Bendangli Tenyaba Mapa ya kanga junga bener odar. Arogo aser Mungdang asoshi aji tongtipang. Saka sensaksemba mapang nung ateptsüng/lim dangi meyipa tenyaba mapa inyaksü(Back to Home Mission) nungdaker ta aikati lemsatep. Arogo ta kodang südir, tulu tila ajak nung inyakyim (structure) kasa. Saka lim Arogo aika nung rongsen agi tsükdakba yong mapa abensa meinyakteter. Iba ya ABAM asoshi tebilemstü tulutiba ta agizüktsüla. Pei chir nungdakba, tanela aser shi,peria magütsü yur dangar yaribaji tai (temenen) masü na? Dangar meyaritsüla ta ashir masü saka anemsü jakla lira ibajibo melenshitsu tajungba.

ABAM kübok Arogotem liromedema aintsü asoshi Ao Arogotem nung tenzükker ajak kasa jenjang nung amshitsu. Sannüker nem ita sen Rs.10000/- magütsüteter Arogotem ABAMi yaritsütelemtetba tajungmapa küma inyaka aruba ya pilot project ser yamala mapa ano inyaka ABAM kübok Arogotem sümedema yangertsü nükla ayutsü junger. Ya inyaksü tasak saka tamakoktsü mapa masü ta tangatetba nung ajaki temulung agütsütsüla.

#### b. Litsü atena/Bendang Tenyaba mapa

Litsü atena/Bendang tenyaba mapa ya kanga takok ngua aodar. Bendang (international) mission telok balala den amalitepa inyakba dang masü saka asen tsüraburi kümteta doktsüba mungdangtem den ano khen asentenshia parnok den mission inyaksü junger. Iba ya ajanga leman aisü nung parnok ajungketba dang masü asen Aora temaotsü asütsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Afghanistan nung tanungba Khristantem kanga timtemtsü: ADF



Afghan nunger Khristan 100 shi Pakistan-i aoba noksa nung angur. FMI nungi Bruce Allen-i, Pakistan-a Khristantem alitsü majungba linük ka lir, ajisüaka Khristantem Afghanistan nung Taliban yimsüsüba kübok aliba dang nungi Pakistan nung aliba tajungba asütsü, ta metetdaksü.

**August 31, 2021:** Meimchir temeden atema inyakba telok ADF International-i alima linüktem dang Afghanistan nung tang anünga aliba Khristan 10,000 densema minority tema iba linük nungjagi anitettsü atema inyaktsü mepishi.

"Tang Afghanistan linük nung Khristan 10,000 shi lendong nung lir, aser parnok timbaka Islam yimsü toktsürtem lir. Islam yimsü toktsübaji ozüing alema aibelen ka lir aser Sharia ozüing kübok tasüba temerenshi agütsütsü akok," ta UN nung ADF International nungi legal officer, Giorgio Mazzoli-i metetdaksü.

Human Rights Council 31 buba special session nung jembidang Vienna nung amenoka aliba ADF International-i Afghanistan nung meimchir temeden alema inyakba aser tang tensa kanga mejungi aliba osang metetdaksü.

"Nisung tepsetba aser amokmerenba kanga bulua atalokdar. Onoki States aser linüktem dang reshikangshi tia nung aliba minorities atema inyaktsü aser parnok ket nung travel documents meliaka parnok ajak tekara nung iba linük nungjagi anitettsü atema inyaktsü mepishir," ta ADF International-i metetdaksü.

Afghanistan nungi US sepaitem agienba sülen Taliban teloki linük yimsüsü tenzükgogo. Tesüiba anogo ishika tsüingda Afghan aser America nunger densema linük aikati pei sensotem iba linük nungi anitetogo aser ano aikati iba linük toktsür oner.

Taoba Brihostibarnü Kabul nung aliba Hamid Karzai International Airport kima kiralongrartemi bomb pokdaksüba lendong nung U.S. Marines 10, Army ana aser Navy Corpsman ka densema civilian 170 dak tema asü.

Ibaji mangyanga US sepaitemia ISIS-K telok nungi lenir ana tepsetogo.

Honibar tashi nung nisung 117,000 dak tema Afghanistan nungi anitetogo aser parnok timbaka Afghan nunger lir, ta Army Maj. Gen. William Taylor-i metetdaksü.

ADF International-i, lendong ajurutsüsa alirtem Afghanistan nungi anitetba atema pelar, ajisüaka ano maneni reshikangshi tia nung aliba tanungba Khristantem densema minorities ajak anitettsü atema inyaktsü onoki mepishir, ta metetdaksü.

"Onoki sorkartem dang Afghanistan-i meyipa yokba

maparen khenpiga atema anena atatsü aser pei tamangba yimsü ajanga reshikangshi ajangshir Afghan nunger refugee tem temepishiba agizüktsü mepishir," ta Mazzoli-isa ashi.

Tawa U.S. Commission on Religious Freedom (USCIRF)-i US sorkar dang lendong ajurutsüsa alir Afghan nunger minorities-a aika iba linük nungjagi anitettsüla, ta mepishiogo.

ICC-ia anüdoklen aliba linüktem dang US aser NATO sepaitem den külemi inyaker Afghanistan nunger dang masü saka Khristantem densema iba linük toktsür oner ajak yaritsüla, ta mepishiogo.

# Nütsüng timba aliba UP nung Khristantem kanga reshikangshir



Tan ita tetenzüklen Uttar Pradesh nung police-i Khristantem asempuera noksanung angur.

**Luroi/August 31, 2021:** India nung nütsüng timtiba aliba state- Uttar Pradesh nung Khristantem anema inyakba kanga bulua atalokdar; tesüiba ita asem tsüingda Uttar Pradesh nung Khristantem anema inyakba tatalokba 50 tashi liasü, ta Mongolbarnü International Christian Concern (ICC)-i metetdaksü.

Bibles For The World telok nungi John Pudaite-i, "Hindu nationalism nung ajemdaker Khristantem anema inyakba kanga bulua ataloker. North India nung Hindu belt tiyongtsüji Uttar Pradesh lir," ta metetdaksü.

"Iba tesem (Uttar Pradesh)

nung parnoki (Hindu yimsü alia amangertem) kecha marendaki Khristantem anema inyaker; sorkaria parnok pusemer," ta paisa metetdaksü.

Alima nung Khristan ka asütsü atema linük tamajungtibatem rongnung India densema lir. Tan ita tetenzüklena Uttar Pradesh nung Khristan aseme coronavirus tashidak agi kinünger aika asüba sülen mangyimer Hindu nunger sangremer ka semdanga sarasademtsüba atema Hindu yimsü alia amangertemi azük. Tesülen police-i aibelener Hindu nungertemji masü saka Khristan asemji ang pua jail nung puoka liasü.

# ANO GO ABEN TSÜNGREM DEN

## Ateta atsüingba Tsüngrem o

*Kechiaser Tsüngrem O taküm aser teinyak aser anatsü nok ajak dang nungi techiraba; aser taküm o tenüngla ya ajak ateta tsünga bendangtet aser temulung tebilemba aser tasa asaba yakta metetba. Ibr 4:12.*

Tsüngrem Oi na mesüngzüktetti kümdaktsür asü? Kodang nai Laishiba azünger, nai azüngba Lai tekong jagi na mesüngjemi kümdaktsür asü? Kodang nai sermon angadir, Lai jagi ne den jembir ama nai bilemer asü? Nai Tsüngrem Oji taküm aser nai bilemba ajak bendanger ta nai metetta arur.

Kodang Tsüngrem Oi ne den jembir ibai teti nükjitong ka asoshi jembir. Tsüngremi ne mulung aser na Khrista den akanga sendaka alitsü asoshi na kechi nüngdaker aji metet. Nai temenen indang jembiba tebilemetsü kar lira, ne dangi aruba Oji temeli ajanga arur. Nai tatok agütsütsü merangya lira Tsüngremer jenjang nung tatok agütsütsü o jagi sayutsü. Asükümüji ne taküm nung kamdong takang ka lir. Tsüngrem ne den ajemtsü atema jembitsü. Kechi temenen indangsa jembidir jembiang, iba mapa ajak na Tsüngrem ajanga nokdang.

Ne tamang nung mesüngjemetetba paidoktsü lenmang kaji Tsüngremi ne den jembiba mangai toktsübaji lir. Nai Laishibaji mezüngi toktsütsü akok aser kong iba o sayur iba nung jagi pilaa alitsü akok. Shirnoki ibai soter ta nai metet, nai parnokji sentoktsü akok. Tajungtiba telangzübaji ken zülur sarasademji lir: "O Tsüngrem, kü dak bushiang, aser kü mulungjang metetangma: Ni tendangang, aser kü tebilemba metetangma" (T.Ken 139:23). Maneni Tsüngrem O jagi ne mulungjang shidokjang aser temenen kar ta lira bushitettang (Ef. 5:26). Teti ne taküm aser Tsüngrem O ajanga ne dang kechi ashir ana tsüngdaji sendaktepa ali bilemang. Tsüngrem O-i ne tebilemba aser ne mulungjang metetter ta metetta Tsüngrem O ajakji süoki ia agitsü yimya küma alitsü merangang.

Bibles For The World teloki Tsüngrem O mangshidangba tesemtem mesüra Laishiba kanga bulua maliba tesemtem aser Khristan yimsü tera-ayang tenzükbata tesemtem nung inyaker, aser item rongnung Nepal, Cambodia, India nung tesem kar aser Asia linüktem densema lir.

Taküm June ita nung Pew Research Center-i India nung yimsü balala dak sendakba report ka saya liasü. Iba sülen Evangelical lenirtem senden ka mena iba report ji asadanga aser medemdanga liasü.

Osangbener dang jembidang Evangelical Fellowship of India nung general secretary, Vijayesh Lal-i, "Pew indang report nung aliba osangji karbo shidak, ajisüaka India nung atangji tatalokbatem aika shia mali, item rongnung yimsü nung ajemdaker tesempa aser telemsa adokdaksüba densema lir," ta metetdaksü.

EFI-i Pew report asadanga sülen EFI indang Religious Liberty Commission (RLC)-ia India nung Khristantem sempaba aser taküm küm tenzüker June ita tashi nung Khristantem anema inyakba

report ka saya. RLC-i, taküm June ita tashi nung India nung Khristantem anema inyakba tatalokba 145 liasü; Khristan asem tepset, Khristan 22 dak azük, Tenla ki amakba mesüra raksatsüba tatalokba 22 aser yimsüngtem nung Khristantem mindokba mesüra lokti nungi jendokba tatalokba 20 liasü, ta metetdaksü.

Tesüiba küm ishika tsüingda India nung Khristantem reshikangshi kanga bulua kümogo. Bibles For The World-i India tesem ajungalen Arogo lenirtem yaria Tsüngrem yimli atema Laishiba densema nüngdak balala agüja arudar.

Pudaite-i, "Onoki lisopur Khristantem, ministries aser Arogotem Tsüngrem O nung tetangshi kümdaktsütsü atema inyaker, koba ajanga parnok tamang jenjang aintsü aser parnoki maneni Khrista osangtajung proktetsü," ta metetdaksü.

"Tsüngrem O atema kanga tzüraba, ochi aser teimla atema tzüraba onoki angur. Amangbapurtem tamang jenjang tashi itta alitsü aser maneni osangtajung proktetsü atema sarasademjang," ta Pudaite-i mepishia metetdaksü.

**OLONG PAITEP # 5923**

1		2		3		4	5			
				6						7
		8								
9				10		11				
			12					13		
						14				
16						17				

- |                                  |  |                                      |  |
|----------------------------------|--|--------------------------------------|--|
| <b>TIPILEN</b>                   |  | <b>LANGTSÜNGLEN</b>                  |  |
| 1. Nisung jenti - (5)            |  | 1. Tenük telong - (9)                |  |
| 4. Tsük rudenba - (5)            |  | 2. Committee dang ajar - (5)         |  |
| 6. Temzüng tesashi - (5)         |  | 3. Yagi ki okdoker - (7)             |  |
| 8. S_ _ _ i - (3)                |  | 5. Yim lenmang - (5)                 |  |
| 9. Nisung rongnung telemsa - (3) |  | 7. Temoatsü keter meyipa aruba - (9) |  |
| 10. Anogoshi - (4)               |  | 11. Kanga junga menemba - (7)        |  |
| 12. Ajanga aor - (4)             |  | 12. Kenyongi majinü - (5)            |  |
| 13. Tsük rizüngdak - (3)         |  | 13. Rong kanga tulu - (5)            |  |
| 14. Tebang nungi adokba - (3)    |  |                                      |  |
| 16. Süngdong tatembangtiba - (5) |  |                                      |  |
| 17. Meputep - (5)                |  |                                      |  |

**OLONG PAITEP # 5922 TELANGZÜBA**

- |                                  |  |
|----------------------------------|--|
| <b>TIPILEN :</b>                 | <b>LANGTSÜNGLEN :</b>                  |
| 1. Tanga, 6. Wara, 7. Rajang,    | 2. Anga, 3. Yabang, 4. Tarok, 5. Orak, |
| 9. Anük, 10. Jenjang, 11. Alar,  | 8. Ainer, 9. Anema, 10. Jabili,        |
| 14. Ngashi, 15. Nala, 16. Mechi. | 11. Among, 12. Miim, 13. Anem.         |



**2021 AUGUST ITA LILI RESULT !**

August ita nung Lili tajungtiba (First) shimteta tanü yangi lephsia agütsür. Lili zülur-i September 10, 2021 tashi nung Tir Yimyim Office nungi senpet agizüksü mepishia metetdaksür.

**ALOKBAR KIBONG KONDOKOL :**

Warakla tenu serious shirangba agi anogo asemnü atema tenur aliba towni oa yariteper shilangdang kinungpu Alokba office i or lia ki atong dang techir Polokbai report asür.

- Polokba** : Oja Oja, na malidang ya na, yashibo aunty Rosela asen kidangi arur obala tenaji asen yipdeni ayaketa tuagi....
- Warakla** : Ojang dang shia liang tepu, nübu arurdang tanüngbaji shiang no.
- Polokba** : Haija Oja.  
(Nikongdang Alokba office nungi shilanger külen)
- Warakla** : Saalaa, ana ojang dang alitsü, tanüsa bendangtsü, Talak, nai shitur anenbato tatongi shiangjung.
- Polokba** : Oja na, na tanutsür kidangi or to aunty Rosela aruagi obala tena asen yipdeni tur, yaküm obala malidang uncle John nüna amato talangka mejanga kazü ati-i.
- Warakla** : Ojanga Tambu! Anaprong parabarji ajeabar sülaba!
- Alokba** : Ok, no problem!

Lilir : WhatsApp

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Kupok**

(n) ku alenba oset (hair fastener)

\* Tanü asüngbo tetsürtemi kin kidong mashishii **kupok** agir.

**Kupu**

(n) ku temesüng (grey hair)

Tambur dak **kupu** adokbaji junga angur.

**NAI-A YA METETTER MA?**

**SEPTEMBER ITA TONGTIBANG ANOGOTEM:**

(NATIONAL & INTERNATIONAL)

- \* September 1-7, 2021 : National Nutrition week
- \* September 2, 2021 : World Coconut Day
- \* September 3, 2021 : Skyscraper Day
- \* September 5, 2021 : International Day of Charity
- \* September 5, 2021 : Teachers' Day (India)
- \* September 7, 2021 : Brazilian Independence Day
- \* September 8, 2021 : International Literacy Day
- \* September 8, 2021 : World Physical Therapy Day
- \* September 10, 2021 : World Suicide Prevention Day (WSPD)
- \* September 11, 2021 : National Forest Martyrs Day
- \* September 14, 2021 : World First Aid Day
- \* September 14, 2021 : Hindi Diwas
- \* September 15, 2021 : Engineer's Day (India)
- \* September 15, 2021 : International Day of Democracy

(Maneni asüng adok nung...)

**TANÜBO NAI LANGZÜANG**

Q. Koba State nung Jim Corbett Tiger Reserve lapoka lir?

A.Uttarakhand

B.Uttar Pradesh

C.West Bengal

D.Karnataka

(Taruba adok nung onoki langzüsü)

**YASHI ADOK TELANGZÜBA : Karur**

**SUDOKU # 5964**

**TELANGZUBA # 5963**

			6	3		9	8	5	9	1	6	2	4	7	8	3	
9			7	4	1		5	3	6	4	9	8	7	2	5	1	
				9				7	8	2	3	5	1	6	9	4	
	2		1	4			6	3	1	2	3	5	7	8	4	6	9
8	1					2		4	5	8	1	9	6	3	7	2	
	6		7	2				9	7	6	4	3	2	5	1	8	
		3					1	2	6	4	7	8	1	3	9	2	5
		5	4			6	7		2	1	9	7	4	5	8	3	6
			9	2		8	3	4	8	3	5	2	6	9	1	4	7

**OJANG LUTEP # 5509**

- YUBTUA** :
- NGNU** :
- NIDMAAKI** :
- IPE** :
- KALUMONG** :
- NGYAKINDA** :
- NGATARA** :
- EMITIMT** :
- SAKTSIDAÜTSÜ** :
- ÜMAKER** :

**OJANG LUTEP TELANGZÜBA # 5508**

**KHEN KHENBO KIJAI MASÜ SAKA LONGJEMER INYAK NUNGANG TAKOK ANGUR**

**TAN HOPTA ATEMA - KOMA SÜLA ?**

Q. Tang Nagaland nung parnoki meshiba ama, Mangkolemba, Tseminyu, Shamatore aser Tobu district tasen 4 akümtsü state government-i agizük nunga koma süla ?



Moradabad nung school metenzükshi tsungda mapa inyakeremi classroom ka merektetba noksa nung angur. UP sorkari September 1 nü nungi junior class tem lapoktsü temelaba agütsüogo.

### State aser UT tem nem Covid vaccine doses 64.36 Cr agütsüogo

**New Delhi, Luroi/August 31 (Agencies):** Centre-i angati agütsüba aser direct state procurement category ajanga state aser union territories tem nem coronavirus vaccine dose crore 64.36 dak tema agütsüogo, ta health ministry-i Mongolbarnü metetdaksü. Maneni state aser union territories (UTs) tem nem dose 14,94,040 agütsütsü, ta kasa sangdong ajanga metetdaksü. Ministry-i ashiba agi, state aser UT tem ket nung COVID-19 vaccine doses 5,42,30,546

anunga lir. Centre sorkari linük ajunga nung vaccine takaratiba nung agütsütsü aser inyakyim atsülangshitsü bendanga agütsür lir, ta ministry-i ashi. Vaccine tali agütsüba ajanga aser iba den state aser UT tem teka nung aliba vaccine tem indang osang tejangja agütsüba ajanga sentong tapet yanglutsü asoshi lenmang sadema lapoktsüba aser vaccine supply chain kanga junga azüokba ajanga vaccine agütsüba sentong kanga takok ngua inyakyonga odar, ta ministry-i

ashi. Linük ajunga nung vaccine agütsüba sentong nung shilem ka ama, sorkari state aser UT tem nem COVID-19 vaccines angati agüja parnok nongita arudar, ta kasa sangdong ajangasa metetdaksü. COVID-19 vaccination drive tawabangba kübok sorkari linük nung vaccine yanglurtem ket nungi vaccine shilem 75 alizüka state aser UT tem nem vaccine angati agüja arudar, ta health ministry-isa metetdaksü.

### Chhattisgarh Tribals society-i highway & train lenmang mokdanga ayu

**New Delhi, Luroi/August 31 (Agencies):** Chhattisgarh tribal society-i Mongolbarnü, Silger nung khatepba lendong nung yimdak lir asem asüba atema ochi obendang agütsütsü aser Panchayat Extension to Scheduled Areas (PESA) benoktsü atema khanga longkak ait. Longkak aiteremi Chhattisgarh kübok district aika nung highway tongtibangtem aser train senzüba lenmang mokdanga ayu. Sarva Adivasi Samaj-i anir longkak aitba sentong ya Baloda Bazar, Balod, Bilaspur, Raigad, Gariaband, Kanker, Narayanpur, Bijapur, Dantewada, Surguja district tem nung anepdang 11:00 ako shi nungi tenzük. Parnoki gari senzusenpong nokdangtsü asoshi lenmang nung osettsüt nangdena ayu. Administration-i train lenmang merektettsü merangdar. Bhilai Steel Plant

anasa gari ka danga senzusenpongba osang mali. Chhattisgarh Sarva Adivasi Samaj working state tir BS Rawate-i, khu abenba gari aser train tem dang nokdang ta ashi. "Onok takhangba mataloktsü tashi rongsenketsung nung tenokdangba agütsütsü," ta pai ashi. Chhattisgarh sorkari Scheduled Areas tem nung PESA Act benoktsü nangzükba ama minyakba aser Silger nung khatepba lendong nung asür kinungertem nem lakh 50 aser yirur alirtem nem sen lakh 5 agütsütsü nangzükba minyakba atema tribal society-i sorkar kanga mejungi aitsü. "Sorkari tenangzükba agütsüba ama minyakra longkak aittsüba dak alaker onok asoshi tanga lenmang kecha mali," ta Rawate-i ashi. "Onoki iba inyakyim ya July 19 nü nungi

development blocks tem nung tenzük. Sorkari onok den sensak asemtsü atemaa maru. Tang iba inyakyim ya asendenshir inyakyonga aotsü," ta paisa ashi. May 17 nü CRPF-i Bijapur-Sukma district artsü nung Silger yimtsung nung Naxal camp amenokba anema nokdakertem dak injang khaloktsü. Iba lendong nung yimdaklir asem asü aser nisung nongtepba mapang mashisa aliba tetsür ka yiruba sülen mapang tatsüka lir asü. Silger lendong nung asür kinungertem rongnung ka nembo sorkar mapa agütsütsüla aser Naxal tebilemstü teti atema bentettsü atema jenjang tapet agitsü asoshi longkak aiteremi khanga liasü. Parnokisa promotion nung reservation dak sendakba nung moratorium metembang tashi SC-ST mapa tazung alibatem nung promotion magütsütsüla, ta ashi.

### Indian envoy aser Taliban lenir na Doha nung ajurutep

**New Delhi, Luroi/August 31 (Agencies):** Qatar dangi Indian envoy aser Doha nung Taliban political office tekolakba na tang mezüngbuba yimden yimsüsüba dak sendakba nung sensaksemogo, ta ministry of external affairs-i Mongolbarnü ashi. Indian ambassador Deepak Mittal, aser Doha nung Taliban indang Political Office tekolakba Sher Mohammad Abbas Stanekzai na Indian Embassy nung ajurutepa liasü. Taliban-i iba senden amentsü atema mepeshia liasü, ta ministry-i ashi. "Afghanistan nung sabanga aliba India nungertem takaratiba nung linüki meyipa arutsü aser

parnok tekümzükba kübok toktsütsütsüba dak rangloker sensak asem. India semdangtsü jangraba Afghan nung aser talisa lokti nung nütsung agi ajema alirtem indang onüka benoka sensak asem," ta ministry sangdong ajangsa metetdaksü. August 15 nü Taliban-i Kabul atsungba sülen tang mezüngbuba India aser Taliban na sensaksemogo. Senden nung India-i, Afghanistan litsü ya India nung anema inyakba maparen atema aser kiralongrartem nem mamshidaksütsüla ta ashi. Taliban leniri India tebilemstü süoki ia agitsü tenangzükba agütsüogo, ta ministry-isa ashi.

### Amit Shah-i J&K industrial development portal amenoktsüogo

**New Delhi, Luroi/August 31 (Agencies):** Union home minister Amit Shah-i Mongolbarnü, Jammu & Kashmir nung Industrial development atema unit tem züngoksemba portal ka amenoktsüogo. Shah-i industry nung lenirtem dang Jammu and Kashmir terenlok nung teyari agütsütsü atema sen intoktsü ayongzük. "New Central Sector Scheme 2021' kübok portal tasen ka amenokba ajanga industrial sector nem tajangzük crore 24,000 dak tema agütsütsü. Iba ya


estimate ka dang lir," ta Shah-i ashi. Portal amenokba sentong nung Union ministers Piyush Goyal aser Jitendra Singh nata densema liasü. Iba portal ya 'New Central Sector Scheme for industrial development of Jammu and Kashmir' kübok amenokogo, koba Goods and Service Tax kübok manufacturing entity mesera temsüa aliba service sector enterprise aser züngoksema aliba business enterprise atema asütsü, ta ministry of commerce & industry-i metetdaksüogo.

### West Bengal nungi BJP MLAs Das TMC nung denogo

**New Delhi, Luroi/August 31, 2021 (Agencies):** Mongolbarnü, Kolkata nung West Bengal nungi BJP MLA Biswajit Das aser BJP councillor Manotosh Nath naprongla Trinamool Congress nung denogo. Biswajit ya North 24 Pargana nungi Bagda indang MLA ka lir. Biswajit, shibai 2019 küm BJP nung adentsü asoshi TMC toktsü, pai ashiba agi, "mangatetep kar adokba ajanga, memelenshitsüla aliba ka nung temelenshitsü kar bner aruogo. Ni kidangi meyipa aruogo aser ni state aser constituency nung aliba nüburtem asoshi ni maneni inyaktüsü."

inyaktüsü mesüra mangyangtsü asoshi BJP-i asalentong yanglur ama temulung meleme bilemer. Ghosh-i, West Bengal nung nüburtem tsungda rongrong, tsükchitep aser tesempatep adokdaksütsü nükjidong yur BJP puri inyaka liasü aser ibayongji TMC nung adentsü ni temulung meyip, ta ashi. "West Bengal nung alir nüburtem ajangzükdaksütsü asoshi TMC den teka amteper inyaktüsü ni ajak ajungshir. Chief Minister Mamata Banerjee jenjang aser la mapatong tem akangshidaksütsü asoshi asenok longjemmer inyaktüsü nungdaker," ta pai shisem.

June ita tetenzüklen, BJP MLA aser party indang national vice-president Mukul Roy-a tanaben TMC nung denogo. Roy-i BJP party nung adentsü asoshi Mamata Banerjee-i aniba TMC toktsür, küm pezü lir pa tanaben Mamata'er telok nung adener asütsü. Tawa agiba West Bengal Assembly elections nung Mamata Banerjee-i aniba Trinamool Congress puri menden 213 takok angu. Menden 294 atema toktepba State Assembly Elections nung, Bharatiya Janata Party puri menden 77 dang kokteta liasü.



New Delhi nung Supreme Court nung Justice Hima Kohli tenangzüktepba agiba maparen CJI N Ramana-i achaayanga agiba noksa nung angur.



Afghanistan nungi anizüker arurtem Rota, southern Spain nung aliba Naval Station nung US air force tayimtsü ka nungi aluba noksa nung angur. United States-i Afghanistan nungi par nüburtem aser sepaitem anizüker ariba maparen Hombar aonung tembanga America asoshi rara talangtiba tatem kati aruogo.

## Japan Defence Ministry-i budget shilem 2.6 ajungkettsütsü atema benok

**Tokyo, Luroi/August 31 (Agencies):** Japan Defense Ministry-i Mongolbarnü budget shilem 2.6 agi ajungkettsütsü asüngdangogo. China kanga tashi ita aoba mapang ka nung linük military tashi itshitsü atema iba jenjang ya agiogo.

Ministry-i meshiba budget ya 5.48 trillion yen (\$49.86 billion) asütsü koba April 1, 2022 nungi benoktsü. Finance Ministry aser parliament-i iba budget ya agizükra otsü tasen ka asütsü. Japan nung küm tekububa atonga defence

ministry budget ajungketyonga arudar.

China temeket nung parnok military inyakyim aser Taiwan aser US den mangatettep tali kuma aoba ajanga Japan kümdangshir.

Ministry sangdong ka ajanga, China indang military tashi kanga ita akümba aser military dak sendakba nung parnoki sen kwi intoker, iba indang mejangjaba ya shisabulutsü ka lir, ta ashiba den Japan nungeri azüoka aliba tzüyim nung China nunger

inyakyim aitsüogo.

Japan-i Ishigaki asetkong densen linük southwestern tesemtem aser asetkongtem nung defense akangshidar. Parnoki Ishigaki asetkong nung military base tasen ka amenokogo, kong land-to-sea missile defense system lapoktsü. Ishigaki asetkong ya nisungbo mali saka Japan-i azüoka aliba Senkaku asetkong anütoktiplen lir, koba China-ia parnok meyong ta ashir aser iba asetkong dang parnoki Diaoyu asetkong ta ajar.

## Afghanistan nung Taliban-i takok anguba benjonger

**Kabul, Luroi/August 31 (Agencies):** Afghanistan nungi US sepaitem okshia omaba sülen Taliban-i Kabul airport nung kibur kuma parnoki tanaben yimsü asüba benjonger.

Afghan nung iba telok yagi tangbo Afghanistan ya shinga küboka mali aser tashi temeden aliba linük ka lir ta US sepaitem ainshiba tenüngsang agüja parnok ainshiba ya otsüsütsü mapang ka lir, ta Mongulbarnü ashi.

"Afghanistan den tepela lemsateper... iba takokba ya asenok ajak meyong lir. America nunger madak takok nguogo, military operations amshia par nukjidong mataloktet," ta Taliban odongtar Zabihullah Mujahid-i Hamid Karzai International airport nungi osangbener dang ashi.

Hombar aonung Kabul airport nungi sepaitem ainshiba ajanga United States indang rara talangtiba tatem kati arua liasü, aser Taliban-i August 15 nü linük ajunga amokbangba sülen iba airport nungi nisung 123,000 dak tema anizüker ogo.

Taliban sepaitem airport telungi ait aser tepela nung yimti tesem ajungalen injang khashishia liasü, koba 2001 küm US sepaitemi atsüngdokba sülen tanaben meyipa shilangba maparen ka lir. US nung 9/11 lendong agütsüba atema tai tonglokja aliba al-Qaeda telok den sendaktepa aliba mechi US

sepaitemi Afghanistan yimtenren nungi Taliban atsüngdoka liasü.

America nunger sepai tatembangba ya Kabul nungi ayatirm atongtsü lia (19:30 GMT) ainshi, ta US Central Command indang tekolakba, Marine General Frank McKenzie-i ashi.

"Onoki anizüker onüba amabo anizüker motet. Saka onok ano anogo 10 yangji ali asünunga, onoki anizüker onür ajabo anizüker motetla."

Afghan nunger karbo Taliban-i taoba mapang 1996 nungi 2001 tashi yimsü asüba ama tanaben yimsü asütsü shisabulur, kong tetsürtem temeden magütsü aser justice system nunga tashiyim amshia liasü.

Ajisüaka Taliban-i talenba salatsü nenshia nangzükogo aser taoba mapang ama yimsü masütsü ashir.

"Onoki US aser aliba den tesendaktep tajung aginer. Onoki parnok ajak den tesendaktep tajung pelashishia agizüktsü," ta Zabihullah Mujahid-i ashi.

Taliban security forces ya anepalur aser tajung asütsü, ta pai ashi.

"Tang tensa nung linük anitsü nüngdakba angateta lir ta Taliban-i tetenzük nungi Afghan aser linük balala nem angatetdaksünüa aru," ta Kabul nungi osangbener kati ashi.

Ajisüaka tamang makatetba tebilemstü lir. America indang tsükchir linük tulutem, talisa China, Russia aser Iran linüktemi Taliban den ajurutepogo, ta pai ashi.

Tang Taliban-i mezüng anogo ishika ketdangsur ama linük nung koma yimsü asütsü, ta ajaki tenük yoka lir aser aikati linük yutsür onürtem timtem magütsür yoktsü melatsü asü masü ta repranga atar.

Iba linük nung US senso ishika lir, ta US Secretary of State, Antony Bilken-i ashi.

Afghan nunger meyririjang aikati bendanger mission tem mesüra US-i yariba sorkar den küm aika inyaka aru, aser parnok Taliban nungi temerenshi angutsü tetsübu nung linük yutsür aotsü meranger.

UN Security Council ajanga Hombar nung pangzüng ka renemba nung Taliban dang tarutsü anogotem nung Afghanistan nungi nüburtem sadok-sayima senzüdaksütsü aser UN aser danga teyari agütsüba lokti tentet nungi teyari agütsüdaksütsü ajungshia liasü.

Kabul airport ya shirnoki ketdangtsütsü ta tang jembishinüba mapang lir. Taliban-i Turkey dang iba airport indang logistics ketdangtsütsü asüngdang aser parnoki security agütsütsü ashi, saka Tir Recep Tayyip Erdogan-i ano telangzüba agüja mali.

## Bangladesh nung nisung 6 nem tasüba temerenshi agütsü

**Dhaka, Luroi/August 31 (Agencies):** Küm pongu tejakdang LGBTQ temeden asoshi nokdaker nisung ana tepsetba dak sendakba nung Bangladesh nung aliba court kati nokdanga aliba telok nungi züngsem trok nem tasüba temerenshi agütsü aser ana nem temeden agütsü.

Xulhaz Mannan ya Bangladesh nung gay rights indang magazine mezüngbuba aser ka dang aliba, Roopban indang yimozülur liasü. Mahbub Rabby Tonoy ya pa tembar aser külemi inyaker ka liasü.

Tena ya linük yimtiba, Dhaka nung tena alidak ki nun glia April 25, 2016 nung Bangladesh sorkari küm ka tejakdang nokdanga aliba Ansar al-Islam telok nungi züngsemtemi tepseta liasü. Iba telok ya yangji alir al-Qaeda den sendaktepa aliba telok ka lir, ta ketdangsurtemi ashir.

Mongulbarnü sepaitemi kanga sashia tanükba agüja lia special anti-terrorism tribunal nungi Judge Md Majibur Rahman-i Dhaka nung aloba okadak tai tonglokja alir par ti nungi pezü lia obendang ya agütsü.

Tasüba temerenshi agütsürtem rongnung taoba army officer Syed Ziaul Haque Zia densema lir, shiba nokdanga aliba telok nung tekolakba lir, ta ketdangsurtemi ashir.

Iba ken o nung aitsür tanüngba nisung pongu ya Akram Hossain, Md Mozammel Hossain alias Saimon, Md Sheikh Abdullah, Arafat Rahman aser Asadullah alitsü.

Zia aser Akram ya tang tashi moputeti lir aser tena ya ketdangsur dang nungi jenshia senzür ama ken o jembia aser ano temolung melemi alir ana, Sabbirul Hoque Chowdhury aser Zunaid Ahmed, nem temeden agütsü.

Nisung trok yagi central Dhaka kübok Kalabanga tesem nung Mannan'er kidangi prangbong aser nok bener aita pa aser Tonoy ya tepset.

Obendang agütsüba mapang, iba temerenshi yagi Bangladesh nung telungpur mesüra kiralongraba yimya kecha nunga tatok mali ta tatishitsü sayutsü, ta Judge Rahman-i ashi.

Iba ken o nung aitsür nisung pongu bo 2015 küm blogger ka aser publisher ka nok agi lepsetba mechi February ita tasüba temerenshi agütsür liasü.

Mannan adianu Minhaz Mannan Emon-i mejangjaba nisungtem anema ken o benoka liasü aser ozüng amshirtemi kü adianu tepseter ngutetba atema pelar, ta osangbener dang ashi.

"Xulhaz Mannan meyipa monguaka pa tepseter nem temerenshi tesashitiba agütsüba ajanga onok molung süngzükter," ta Emon-i ashi.

Defence lawyer Khairul Islam Liton-i temaba court nung iba obendang ya benoka jembitsü, ta shiogo.

Arishi küm 35 tain Mannan ya Dhaka University nungi international relations nung graduate süa liasü. Pa ya 2007 küm Dhaka nung aliba US Embassy nung mapa inyaka liasü aser mapang tatsüka lir US Agency for International Development (USAID) nun goa inyaka.

2014 küm pa den Tonoy dener LGBTQ rights indang awareness sangdongtsü asoshi magazine ka menüng tenzüka liasü.

Arishi küm 26 tain Tonoy ya linük yimtiba nung theatre group ka nung dena liasü aser People's Theatre ta nüngja agüja aliba lokti tentet ka nung tanurtem dang drama (jilushi) sayua liasü.

# Rotary International Club balalai oxygen concentrator tenla agütsü



Kohima, Luroi/August 31, 2021: Chief Minister Office, Kohima nung Rotary International (R.I) Club balalai COVID Response Project shilem ama Department of Health & Family Welfare nem oxygen concentrator set asem tenla agütsüba mapang tangokba noksa ka yangi angur.

**Kohima, Luroi/August 31, 2021 (TYO):** 'COVID Response Project' shilem ka ama, Brehostibarnü (26.08.2021) Chief Minister Office, Kohima nung Rotary International (R.I) Club balalai Department of Health & Family Welfare nem oxygen concentrator set asem tenla agütsü, ta sangdong ka ajanga metetdaksü.

Iba project (COVID Response Project) shilem ama, Rotary Club of Sainte Marie Garros Centenaire (Reunion Island France), Indian Business Club(Paris, France), Rotary Club of Mumbai Ghatkopar

(R.I. Dist 3141), Rotary Club of Nagpur South East (R.I. Dist 3030), Indian Chamber of International Business (France) den külemi tayonger club - Rotary Club of Kohima (R.I Dist 3240) temi Amardeep S. Bhatia, IAS; K.D. Vizo, ITS; Manpreet Singh Nagi; Rajan R. Thaokar; Kohima Rotary Club President, Rtn. Kezhokhoto Savi; First Lady aser PP Rtn. Neisatuo Mero nunger matsündang oxygen concentrator set asem tenla agüja liasü.

R.I indang motto - "Service Above Self" agizüksü aser taküm R.I indang omen - "Serve

to Change Lives" ataloktsü asoshi, Rotary Club Kohima, President-i, tang ama Covid-19 mapang lokti asoshi ajaki meranga inyaksüla ta sensopurtem ayongzük.

Iba Club-i Phek District kübok tesem tezülen aliba Community/Primary Health Centre tem nung oxygen concentrator kar tenla agütsü bilemdar aser iba den külemi ano oxygen concentrator talila kar bener arutsü asoshi inyaktepdar; aser Kohima jila kübok Government High School ka nung Club-i vending machine ka tenla agütsü tebilemba lir, ta Savi-i shisem.

# TIPRA chairman aser TTAADC züngsemtemi Brazilian Ambassador den ajurutep

**Agartala, August 31, 2021 (Agencies):** The Indigenous People's Regional Alliance (TIPRA) Chairman aser Tripura Tribal Areas Autonomous District Council (TTAADC) züngsemtemi India dangi Brazil Ambassador Andre Aranha Correa den ajurutepogo. Iba senden nung

agriculture, solar energy aser sports dak sendakba onük aika lemsatepa liasü Brazilian Ambassador, TIPRA chairman aser TTAADC züngsemtem tsüngda onük angatettepa jembiogo ta imlar. TIPRA chairman Pradyot Debbarma-i senden amenba osang metetdaksü.

"TTAADC züngsemtemi Brazilian Ambassador Andre Aranha Correa den ajurutep aser Agriculture, Solar Energy, Sports amala onüktem lemsatep. Pai lisapur indang sobaliba kanga metetnüba ashi aser ozü state semdangtsü jangraba lemsatep" ta Pradyot Debbarma-i ashi.

# Security Forces-i medical camp ka ayongzük



**Dimapur, Luroi/August 31, 2021 (TYO):** HQ IGAR (North) kübok Kiphire Battalion - Assam Rifles-i Khongkha village, Kiphire district nung medical camp ka ayongzük aser iba mapang parnoki tantsü-tambu tem aser tangar memenep/matamabensar tem anepalua liasü, ta sangdong ajanga metetdaksü.

Khongkha ya Indo-Myanmar arrtsü tezülen aliba yimtsüng ka lir, kong medical facility densema nüngdaka

facility tem peria mangur. India aser kidanger linük talisa Northeast tsütsü arrtsü nung aliba yimtsüngtem nung timtemertem yaritsü aser tongtibangsa yimtsüng nung alirtem den tesendaktep tajung yanglutsü nükjindong yur iba medical camp ayongzük asütsü.

Tesendaktep tajung yanglutsü shilem ama, medical team-i Khongkha yimtsüng nung matamabensar asem aser arishi küm 101 tain tantsür ka anepalua yariogo.

Parnok dak alaka, iba camp mapang team-i yimer 75 shi anepalua aser parnok timtem den apet mozü agütsüogo. Tang ama mapang, nübür nüngdakba ajiteta yariba asoshi Khongkha yimtsüng nung tantsü-tambu, GB, chairman aser pastor temi Assam Rifles dang pelaba lemsatepogo. Iba den külemi tarutsü nunga security forces den amalitepa aser telongjem nung aotsü asoshi yimertemi nangzuka liasü, ta kasa sangdong nung shia lir.

# SÜR KÜM 1 AJUNGBA

## Lt. L. Asangla (Yaongyimsen)

01.09.2020

Tanü onoki na bilemtetba mong, saka ibai tanü tasen masü, teti onoki nü tenüng tetshir, joko onok akaba ajak agi nü ten külem aliba otzütem aser noksa, temeim, ochi shisatsü, ajemalu, bilemdangba etc..tang ang tasen küma onoki sü-ok-ki-ia rajemer. Mejembima onok molung nung lir, ola madoki na onok molung nung teti lir.

**Temeim Kinüngertem.**



Office of the

## Mangmetong Watsü Telen

Mokokchung, Nagaland

### KONANG TETUSHI AGÜTSÜR

Wt. S. Arenla Lkr W/o Wb. C. Temsü Imchen (Mangmetong), tetemsü aser teyakyak watsü tajung ka, 23 buba Watsü Mungdang Tir asütsü shimba asoshi Mangmetong Watsü Telen-i pelaba den konang nüngsang aser tetushi agütsür.

Ne lenisüba nung asen Aotsür ano tali tejakleni aoba den külemi ne wadang Tsüngremi takokba nung aniang ta onok teimla aser sarasadem.

Sd/-  
Tiakala Tzüdir  
President

Sd/-  
Moarenla Jamir  
Secretary

In the Court of

## Principal District & Sessions Judge

Mokokchung : Nagaland

S/C NO. 138/2021

### NOTICE


**NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925**

Whereas application under Succession Act 1925 for grant of Succession Certificate for the estate/pension benefits of Late A. Katenmeren has been applied by Smti. Lanuzenla W/o Lt. A. Katenmeren R/o H.No. 890 Mongsen Sector Ungma Village, Mkg. Nagaland for possession of:

Family Pension, PPO No. 111609865, Closing of A/c

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 24.9.2021 Given under the hand and seal of the court on this the 24.8.2021

Sd/-  
Principal District & Sessions Judge  
Mokokchung: Nagaland



Hombarnü Assam Police-i truck gari ka nung ganja seret 500 bena lia apu. Registration number (AS01AC/6911) truck gari nung ganjaji taseptsü 50 nung bena liasü aser iba indang jengjangji Rs 1 crore shi asütsü ta asadangtetogo ta Kokrajhar Superintendent of Police (SP) Thube Pratik Vijay Kumar-i ashi. Truck ji Tripura nungi Bihar-i aoerba liasü aser police-i truck indang handyman apu saka driver jena ao. (Gossaigaon, August 31)

## MMA asayar Longtsukumba Ao, Dimapur tonga aruogo



**Dimapur, Luroi/August 31 (TYO):** GAMMA Asian MMA Championship 2021 nung Silver medal angusang Mixed Martial Arts (MMA) asayar Longtsukumba Ao tanü Dimapur tonga aruogo.

Pa tanü Dimapur Airport nung Longsa Senso Telongiem Dimapur, Longsa Senso Tetsür Telongiem Dimapur, Longsa Student Union Dimapur aser Aoyimkum lanurtemi agizüka liasü. Longtsukumba-i India tenüing nungi Kyrgyzstan nung asayaba GAMMA Asian MMA championship 2021 nung shilem agi, aser welterweight category nung pai silver medal angu.

Longtsukumba Ao ya Longsa nunger senso tajung P. Limawati aser Takalemla na

jabaso tanobusang lir aser pa tang Aoyimkum nung alir. Pa 2014 küm tatemlen nungi Mixed Martial Arts (MMA) asaya tenzük. Mezüingbo pa temang anema alitsü aser self defence atema asaya saka asaya tenzük ita ishika aoba mapang iba asaya nung tangar den toktepa asayatsü atema pa dak sempet keta aliba jangjaa aküm aser pa training agidak, Combat academy nung coach temia tetoktepba balala nung shilem agitsü ajungmesoa liasü.

Pa mezüingbuba 2015 küm Mokochung Yoda Fighting Championship nung shilem agi, aser iba asayamung nung takoker rongnung aden. Iba sülen 2017 küm national jenjang nung AIMMF asayamung nung

asaya aser pai bantamweight category nung gold medal ngua liasü.

Kasa mapang nung pa 2019 küma national asayamung nung shilem agi saka quarter final akokba sülen yiruba ajanga masayatetsa aküm. Tesüsa pai GAMMA Asian MMA championship 2021 nung India tenüing nungi asayaba mapang silver medal ngutetogo.

Maneni Longtsukumba Ao ya taküm December ita Germany nung World championship nung shilem agitsü atema India team nung züingoksemogo aser tang iba asayamung atema renemshi tenzüksü, ta pai ashi.

Aoyimkum nung par kidang Tir Yimyim osangbenertem den sensaksemba mapang bendanger asayatem skill indang jembidang pai, "Bendanger asayatem den asenok skill kecha balala tebandang mali, saka parnok aser asenok na tebandangji, parnokbo itashia asayamung balala ayongzüka asayar saka asenokbo küm ka nung mesera küm ana asem nungang asayamung ka ayongzüka asayar, aser ibaji ajanga cage nung experience parnok taliba, koba kanga tongtipang lir," ta ashi.

"Asayamung nung shilem agiba shia tangazükba balala angur, koba kanga tongtipang aser iba ajanga peisasa pei dak tali temolung lema kümdaktsür," ta Longtsukumba Ao-i ashi.

## US Open 2021: Osaka aser Sabalenka tanabuba round-i iogo

**New York, Luroi/August 31, 2021 (Agencies):** Arthur Ashe Stadium kübok US Open asayamung tetsür kija mezüing round asaya nung, taoba US Open takok angula, Naomi Osaka-i Czech tsür Marie Bouzkova madak 6-4 6-1 agi takok nguogo.

Iba asaya mezüing set takok angutsü asoshi Bouzkova-i merandang, saka lai break point pezü tashi mengutetba ajanga Grand Slam pezüben takok ngur alir Japan tsür Osaka-i iba set koktet.

Mezüing set nung Osaka-i 'winner' 21 zükloksü, saka unforced error 13 angu. Osaka-i iba set akoktsü asoshi tena tsüingda 5-4 aliba mapang, lai Bouzkova indang serve nung point angu. Tanabuba set tenzük Osaka mezüing serve nung timtema asaya, saka lai mezüing game point pungo tashi angu.

US Open anaben takok angula Osaka-i set tanabuba akoktsü point ka dang nüngdaka liasü aser lai iba point nguteta Bouzkova

koktet. Bodhbarnü tanabuba round nung Seed 3buba Osaka-i Serbia tsür Olga Danilovic den asayatsü.

Taoba küm Covid-19 wara tenokdangba ajanga terepranger medeni US Open asaya liasü aser taküm terepranger shilem 100% densema iba asayamung ayonger asütsü.

"Terepranger (audience) matsüandang tanaben tennis asayatsü mapang agi sempettsüba ngua pelar. Taoba küm terepranger maliba ajanga iba asayamung azüing azünger liasü aser tezüdanga asaya," Osaka-i ashi.

Tawa tembangba Tokyo Olympics aser Western & Southern Open asayamung tasembuba round nung tamakok ngur sülen, US Open nung Osaka-i takok nguogo.

Osaka-i ashiba agi, Arthur Ashe Stadium nung kanga dang asayaner.

Tesüiba küm asem tejakdang lai tennis nung mezüing title takok angu.

"Tennis wadang nung

ajemoker külen nungi iba court nung asayaba ama tanga court nung asayadang mali ama bilemer. Mezüing round takok anguba asoshi pelar," ta Osaka-i ashi.

Kasa asayamung tetsür kija asaya tanga ka nung Aryna Sabalenka-i Serbia tsür Nina Stojanovic madak 6-4, 6-7(4), 6-0 agi takok nguogo.

Belarus tsür Sabalenka-i tanabuba round nung French Open semifinalist Tamara Zidansek den asayatsü. Mezüing round tanga ka nung Slovenia tsür Tamara-i Bernarda Pera madak 6-4, 7-6(4) agi takok angu.

Asaya tanga ka nung Ons Jabeur-i Chicago finalist Alizé Cornet madak 7-5, 7-5 agi takok angu. Tunisia tsür Ons-i winner' 29 zükloksü. Kasa mapang, France tsür Cornet-i winner' 8 dang angu.

Ons Jabeur-i tanabuba round nung Seed 20buba Maria Camila Osorio Serrano den asayatsü. Maria-i Ivana Jorovic madak 6-2, 6-2 agi takok ngur sülen tanabuba round tongtet.

## Tokyo Paralympics: Singhraj-i bronze medal angu



**Tokyo, Luroi/August 31, 2021 (Agencies):**

Mongolbarnü, Tokyo Paralympics indang 'P1 men's 10m air pistol SH1' asayamung nung India nunger shooter Singhraj Adhana-i bronze medal takok angu.

Shooter tajungtiba rongnung trokbuba ama final (tetokteper 8) atema temsüa akümba sülen, Singhraj-i point 216.8 tongteta tasembuba jenjang ajanzüktet.

Kasa tetoktepba nung China nunger defending champion Chao Yang (237.9 - Paralympic record) aser Huang Xing (237.5) nati gold medal aser silver medal angu.

Tetsür 10m air pistol SH1 final nung Rubina Francis jenjang tenetbuba nung tembang. Final masayadang Asaka Shooting Range, Tokyo nung Rubina-i point 128.1 angu.

**\*\*Mariyappan-i silver medal aser Kumar-i bronze medal angu**

Mongolbarnü, Paralympics - tebur high jump T42 asayamung nung defending champion Mariyappan Thangavelu aser Sharad Kumar nati silver medal aser bronze medal takok nguogo. Tenati anguba medal densema, tang asaya aliba Tokyo Paralympics nung India Contingent-i medal 10 angur asütsü.

Tebur high jump T42 tetoktepba nung, Mariyappan-i

metre 1.86 shi alemtet. Kasa mapang America nunger Sam Grewe-i tasembuba round nung metre 1.88 shi alemteta pai gold medal angu. Kumar-i bronze medal angutsü asoshi paia metre 1.83 shi alemteta liasü.

Tetokteper tuku rongnung India nunger asayar tasembuba aser 2016 Rio Paralympics bronze takok angusang Varun Singh Bhati-i metre 1.77 malemtetba sülen pa jenjang tenetbuba nung tembang.

Iba tetoktepba mapang, India nunger top three nung asaya liasü aser Mariyappan-i gold medal angutsü imlaa liasü.

Tokyo Paralympics 2020 tenzük Mongolbar tashi nung India-i gold medal 2, silver medal 5 aser bronze medal 3 densema medal 10 ngua lir.

Tesüiba küm 5 tejakdang, Rio Games nung arishi küm 26 tain Mariyappan-i gold medal takok anguba sülen, taküm Tokyo Games nunga India atema pai medal angutsü teimla tulu liasü.

Tamil Nadu nungi athlete Mariyappan arishi küm 5 tanur alidang bus kati pa tetsüing achijilen menüingba sülen, teti atema pa tetsüing tatsük kümadok.

Kumar, shiba Patna, Bihar nungi lir, pa arishi küm 2 alidang polio vaccine taila ka agütsüba sülen, pa tetsüing abilen marakzüte kümadok. Asian Para Games asayamung nung pai anaben tashi gold-medal angu.

Tokyo Paralympics "track & field" saisapong tsütsü, India contingent atema javelin asayar Sumit Antil gold medal angu. Hombarnü, F 64 category tetoktepba nung otsüsütsüsa Sumit-i pungoben tashi pa indang record ajateta asaya liasü.

## Stuart Binny cricket asaya nungi anener

**Luroi/August 31, 2021 (Agencies):**

India nunger all-rounder Stuart Binny-i, Hombarnü pa first-class aser international cricket asaya nungi anenba sangdongogo.

Arishi küm 37 tain Karnataka nungi asayar yagi India tenüing nungi Test asaya trok, ODI 14 aser Twenty20 Internationals asem nung asayaogo.

"Cricket asaya ya kü azü nung keta lir aser ni iba asaya atema meyipa agütsütsü. Asayar ka ama asayaa arur tang coach mapa inyaktsü mapang tongogo ta bilemer. iba department nung ni aika meyipa agütsütetsü ta bilemer, aser ano ni NCA nunga level 2 coach ka lir," ta Stuart-i ashi.

"Ni first-class aser

international cricket asaya nungi anentsü telemetba agiba nenok metetdaktünener. International jenjang temaba nung linük tenüing nungi asayatetba atema ni kanga pelar," ta paisa ashi.

Stuart, Karnataka team nungi first-class asaya 95 nung asayaogo aser Mahendra Singh Dhoni lenisüba nung 2014 küm July ita mezüingbuba England den asayaa liasü aser pai iba Test tanabuba inning nung run 78 yanglu.

Pai Test 6, ODI 14 aser T20I 3 asayaba mapang run 459 yanglu aser wicket 24 agia liasü.

Stuart-i BCCI, pa asayaba team balala, külem asayatem aser coach tem dang pa asaya nung teyari agütsüba atema kanga pelaba lemsatepogo.

## BILEMDANGANG

"Tashitemeteter mesüra takar nema ajakbo abensaa memoatsür."